



## DEKLARASAUN PRELIMINÁR 21 Marsu 2022

### Timor-Leste hala' o votasaun ida ne'ebé organizadu no kompetitivu

*Deklarasaun preliminar husi Misaun Observasaun Eleitorál (MOE) UE nian fó sai molok prosesu eleitorál remata. Sei iha nafatin etapa importante, inklui rezultadu finál no desizaun ba reklamasaun karik iha, no ekipa husi Uniaun Europeia mantein nafatin iha país atu observa. Uniaun Europeia agora bele de'it fó komentáriu kona-ba observasaun ne'ebé halo ona to' o oras ne'e, no tuirmai sei publika relatóriu finál ida, inklui anáлизe no rekomendasaun sira ba reforma eleitorál. MOE bele mós halo deklarasaun adisionál kona-ba kestaun eleitorál ne'ebé relaciona ho eleisaun no bainhira konsidera katak adekuaudu atu halo nune'e.*

### Sumáriu

- Iha 19 Marsu, Timoroan sira ba hili sira nia presidente ba tinan lima. Eleisaun ida ne'e tuir krize polítika ne'ebé hamosu pergunta kona-ba Presidente Repúblika nian podér, konstitusionalidade husi governu no regra prosedimentu parlamentár nian. Períodu kampaña hanesan período pasífiku no bazeia ba liberdade fundamentál sira, tuir kedas ho eleisaun ida ne'ebé organizadu ho di'ak. Kompetisaun eleitorál kontinua domina husi veteranu sira husi luta ba independénsia, no lider polítiku potenciál husi jersaun foun ladún iha vizibilidade.
- Eleisaun ne'e hetan partisipasaun husi númeru rekorde husi kandidatu 16, inklui feto na'in haat. Kandidatu importante ne'ebé koñesidu mak Presidente Repúblika, Francisco Guterres "Lú-Olo", antigu Xefe Estado-Maior Jenerál Forsa Defeza nian, Tito da Costa Cristovão "Lere Anan Timur" no eis-Presidente José Ramos-Horta. Maske kandidatu sira ne'e independente, balu hetan apoiu husi partidu polítiku sira, ne'ebé fó vantajen finanseira no estruturál ba sira kompara ho kandidatu seluk.
- Kampaña ne'e hatudu kompetisaun duni entre kandidatu prinsipál sira, iha ne'ebé liberdade espresaun, reuniaun no asosiasaun sira hetan respeitu di'ak. Maibé, rekursu finanseiru la hanesan – iha kontestu regra finansiamentu kampaña nian ne'ebé la iha limite ba doasaun ka despeza – rezulta iha situasaun la hanesan entre kandidatu sira. Komisaun Nasionál Eleisaun (CNE) husu kandidatu sira atu labele envolve grupu arte marsiál no ritual iha atividade kampaña, no observadór sira husi UE nota sira nia prezensa la to' o 20% husi eventu kampaña ne'ebé observa ona. Kampaña ne'e hala' o ho dame ho problema ki'ik uitoan de'it entre apoiante husi partidu polítiku sira.
- Quadro legál eleitorál oferese garantia suficiente hodi hala' o eleisaun demokrátika. Alterasaun ba lei tolu iha 2021 hadi'a inkluzividade, fiskalizasaun no serteza jurídika. Maske iha mudansa hirak ne'e, frakeza legal sira ne'ebé Komisaun Europeia identifika ona uluk, inklui katak di'ak liu CNE iha supervizaun boot liu atu supervizona finansiamentu kampaña, seidak rezolve. Tuir dispozisaun legál foun, Governu konsulta ho CNE banhira halo regulamentu foun sanulu, fulan rua molok loron eleisaun.
- CNE no Sekretariadu Tékniku Administrasaun Eleitorál (STAE) iha kompromisu atu hala' o eleisaun ida ne'ebé transparente, no parte interesadu sira fiar liu ba sira nia imparcialidade no profesionalizmu. Órgaun Jestaun Eleitorál sira hatudu sira nia matenek iha implementasaun eleisaun no kolabora ho parte interesada eleitorál sira durante prosesu tomak.

- Preparasaun lojístika ba eleisaun suficiente no jeralmente tuir tempu. Observadór UE vizita estasaun votu 174 iha munisípiu 12 no Rejiaun Administrativa Espesiál Oecusse-Ambeno. Enjerál, observadór sira husi UE avalia votasaun no kontajen hanesan di'ak ka di'ak tebes iha kuaze estasaun votu hotu ne'ebé observa no deskreve atmosfera hanesan pasífiku. Prezensa husi fiskál sira garante transparénsia husi prosesu. Observadór nasionál sira hola prezensa iha estasaun votu barak ne'ebé observa.
- Enjerál media ne'ebé pluralista fornese asesu ba opiniaun politika lubuk ida. Rádiu mantein nafatin nu'udar fonte informasaun importante liu iha área rural sira. Monitorizasaun media husi MOE UE nian hatudu katak *Rádio-Televisão Timor-Leste* (RTTL), fornese tempo emisaun gratis no kobertura editoriál ba kandidatu 16 hotu tuir dalan neutrál. Maske nune'e, ninia kobertura ba notisia kampaña la balansu
- Kampaña iha media sosiál hala'o kuaze loos de'it iha facebook. Metade husi kandidatu sira, inklui sira ne'ebé prinsipál, iha kampaña boot iha media sosiál. Kampaña sira ne'e bazeia ba respeito no kandidatu sira fahe informasaun kona-ba sira nia atividade kampaña. Maibé, kampaña online hamosu envolvimentu menus husi utilizador sira. Maske la iha limite kona-ba despeza kampaña nian, kandidatu uitoan de'it mak investe iha publikasaun online ne'ebé selu iha media sosiál.
- Timor-Leste iha proporsaun fetu ne'ebé aas liu iha parlamentu no taxa aas liu iha Ázia no Pasífiku. Númeru rekorde husi kandidatu fetu na'in haat mak kompete iha eleisaun ne'e. Maske nune'e, observadór UE nian nota katak fetu sira partisipa iha númeru ki'ik liu kompara ho mane sira, iha eventua kampaña, no oradór sira uitoan liu mak fetu sira. Mensajen kampaña nian ladún ho objetivu ba kestaun sira ne'ebé afeta fetu sira. Observadór UE nian nota mós katak husi eventua 120 resin ne'ebé observa, kandidatu tolu de'it maka ko'alia kona ba asuntu violénsia doméstika hasoru fetu.
- Barreira sira ba partisipasaun polítika husi ema ho defisiénsia sira kontinua la hetan resposta. Eleisaun ida ne'e la introdús medida espesífika atu fasilita votasaun ba ema ho defisiénsia no adosaun ba boletin votu uza braille la pasa iha Parlamentu Nasionál. Observadór sira husi UE nota katak asesu fíziku ba estasaun votu susar no sai nafatin dezafiu ba eleitór sira ho defisiénsia.
- Grupu observadór nasionál sira estabelese no fahe ba país tomak, hodi aumenta transparénsia ba prosesu eleitorál. *Observatório da Igreja para os Assuntos Sociais* (OIPAS) koloka observadór na'in 1,300 no halo mós kontajen paralela ba votu sira. Aleinde Uniaun Europeia, grupu observadór internasionál sira seluk inklui Komuidade País Lian Portugés (CPLP) no Rede Ázia nian ba Eleisaun Livre (ANFREL).

---

## Konkluzau preliminar

---

### 1. Antecedente sira

Iha 19 Marsu, Timoroan sira ba hili presidente ida ba mandatu tinan lima nian. Ne'e mak eleisaun prezidensiál dalimak ne'ebé hetan observasaun husi Uniaun Europeia. Kandidatu independente sanulu resin-neen kompete iha eleisaun, no balun hetan apoiu husi partidu polítiku sira. Enkuantu *Frente Revolucionária de Timor-Leste Independente* (FRETILIN) no *Congresso Nacional de Reconstrução de Timor* (CNRT) domina espasu polítiku no governa país ne'e iha dekada rua ikus, eleisaun ida ne'e akontese hafoin krize polítika ne'ebé foti kestaun kona-ba Presidente nian poder, konstitusionalidade husi governu, no regras prosedimentu parlamentár.

Kompetisaun eleitoral kontinua domina husi veteranu sira husi luta ba independénsia, no lider politiku potensial husi jersaun foun ladún iha vizibilidade. Prezidente atual, Francisco Guterres “Lú-Olo”, hetan apoiu husi ninia partidu FRETILIN. Maske nune’e, tuir previzaun, votasaun FRETILIN nian sei fahe tanba Tito da Costa Cristovão, “Lere Anan Timur” rezigna-an nu’udar Xefe Estadu-Maiór-Jenerál Forsa Defeza nian atu kompete iha eleisaun ne’e, no nia baze votu hanesan. Politiku tuan no antigu Prezidente José Ramos-Horta, hetan apoiu husi Xanana Gusmão no CNRT. Kandidatu barak mak la iha apoiu husi partidu politiku sira no tanba ne’e, sira hetan desvantajen iha parte finansimentu no estrutural.

## 2. Ambiente Kampanha

### *Kampanha pasifiku iha eleisaun kompetitivu maibe rekursu la hanesan hamosu kondisaun kompetitivu la hanesan*

Observador UE sira tuir periodu kampanha semana rua nian, ho tema prinsipal sira ne’ebé liga ba pas no unidade, fila fali ba orden konstitusional, hadi’a edukasaun no oportunidade empregu nian ba foin-sa’e sira, dezenvolvimentu, nune’e mos tranzisaun ba jersaun foun no fó onra ba legadu rezisténsia kombatente no veteranu sira nian.

Kandidatu hotu-hotu asina paktu dame ida ne’ebé facilita husi Komisaun Nasional Eleisaun nian (CNE) no iha possibilidade atu halo kampanha laho restrisaun. Kampanha ne’e hatudu kompetisaun loloos entre kandidatu sira, no liberdade espresaun, reuniaun no asosiasaun sira hetan respeitu di’ak. Maibe, rekursu finanseiru la hanesan – iha kontestu regra finansimentu kampanha nian ne’ebé la iha limite ba doasaun ka despeza – rezulta iha situasaun la hanesan entre kandidatu sira. Kandidatu sira ne’ebé iha apoiu husi partidu sira iha vantajen boot kompara ho kandidatu seluk.

Regulamentu ida foin lalais kona ba jestaun ba veikulu estadu nian karik iha impaktu pozitivu ba ambiente kampanha, tanba abuzu rekursu Estadu nian observa de’it iha eventu 8 husi eventu kampanha 123. Ida-ne’e marka melloria ida ne’ebé klaru kompara ho prosesu eleitoral sira iha pasadu bainhira utilizaun sala ba rekursu sira Estadu nian sai elementu ida ne’ebé mosu baibain

Lú-Olo, Ramos-Horta, Lere, Assanami no Armanda Berta organiza komisiu boot, bainbain komisiu ida iha kada munisípiu. Observador UE nian relata iha eventu 33 ho ema liu 1,000 (Lú-Olo 13, Ramos-Horta 12, Lere 3, Armanda Berta 3, Assanami 2). Eventu enserramentu kampanha hosi Lú-Olo no Ramos-Horta iha Dili iha apoiante ema na’in 10,000 resin. Iha kampanha husi Ramos-Horta no Armanda Berta sira haree katak líder CNRT Xanana Gusmão no Armanda Berta nia la’en José “Naimori Bucar” dala barak hamriik iha oin hodi hato’o mensajen xave sira.

Observador sira UE nian relata katak organizaun kampanha fornese transporte ba partisipante sira iha metade husi eventu sira ne’ebé observa no oferese insentivu sasán iha maizumenus porsentu 25 husi eventu sira ne’ebé observa. Iha eventu ki’ik liu, jornalista sira, supervizór CNE, observador sira, no polisia sira, dala balun, liu ema ne’ebé apoia eventu kampanha. Munisípiu sira ne’ebé remotu no izoladu liu la hetan vizita husi kandidatu balu, ne’ebé rezulta iha eventu kampanha no periodu kampanha badak iha fatin balun, porezemplu iha Ainaro, iha ne’ebé kampanha remata ho efetivu iha loron 11 fulan-marsu. Pandemia COVID-19 la perturba kampanha bain bain, no balu deit mak tuir medida bioseguransa uitoan.

Hanesan medida preventiva ida hasoru violénsia kampanha, CNE husu kandidatu sira atu labele envolve grupu arte marsial no ritual sira iha atividade kampanha. Lei spesífiku ida bandu duni atu iha asosiasaun entre grupu sira ne’e no partidu politiku sira, maibe lei ne’e la refere ba kampanha eleitoral liu-liu la temi kona ba kandidatu independente sira. Observador UE nian nota prezensa husi grupu sira ne’e la to’o iha 20% husi eventu kampanha ne’ebé observa, liuliu iha atividade Lú-Olo nian (8), Armanda Berta (6), Lere (5) no Ramos-Horta (4). Partidu sira ne’ebé la rejista *Os Verdes* no *Patifor* mos hatudu sira nia kor iha kampanha, liu liu iha apoiu ba Lú-Olo no Ramos-

Horta. Kampaña hala'o iha ambiente ida ne'ebé nakonu ho dame, ho situasaun ema mate ida ne'ebé relasiona ho kampaña no konfrontu ki'ik entre apoiante partidu polítiku sira. Observadór UE nota seguransa polisia nian iha 80% husi eventu kampaña ne'ebé observa.

### **3. Kuadru lugál**

#### ***Alterasaun daudaun ba lei eleitorál sira aumenta inkluzividade, supervizaun no seguransa juridika***

Kuadru legál fornese garantia suficiente hodi hala'o eleisaun demokrátika tuir prinsipiu internasionál ne'ebé Timor-Leste tuir. Alterasaun resente sira ba kuadru legál reforsa inkluzividade, fiskalizasaun no seguransa jurídika. Apezarde mudansa ne'e, frakeza legal sira ne'ebé Komisaun Europeia uluk identifika ona, inklui CNE nia supervizaun boot liu atu supervizona finansiamentu kampaña no implementa regra sira komunikasaun sosiál nian kona-ba tratamentu hanesan no imparcialidade, seidak rezolve.

Alterasaun ba Lei Eleitorál Prezidente Repúblika nian apresenta mekanizmu votasaun auzente ida ba votante sira iha Dili ne'ebé normalmente hela iha munisípiu seluk. Fiskalizasaun eleitorál CNE nian mós hadi'a ona ho provizaun ba ofisiál fiskalizasaun no introdusaun fila fali husi verifikasaun ba votasaun invalidu sira iha apuramentu nasional. Lei kona-ba Órgauns Administrasaun Eleitorál agora obriga ba konsulta ho CNE kona-ba regulamentu governu nian kona-ba lei eleitorál sira no kódigu konduta husi STAE ba kandidatu sira, observadór, ajente partidu no média. Alterasaun ne'e la inklui rekomendasau UE nian husi 2017 atu fó fali autoridade aprovasau ba CNE kona ba regulamentu sira. Lei Resenseamentu Eleitorál e altera ona atu spesifika katak simu de'it ba rejistu dokumentu sira ne'ebé fó sai husi rejistu sivíl.

Tuir provizaun legal foun, governu konsulta ona ho CNE hodi pasa regulamentu foun sanulu, fulan rua molok lora eleisaun. Enquanto kuadru regulador ne'e karik di'ia liu introdús ona antes, observadór sira UE nian relata katak ofisiál eleitorál sira familiar ho mudansa foin lalais ne'e.

### **4. Administrasaun Eleitorál**

#### ***Konfiansa husi parte interesada sira kona ba jestaun eleitorál imparsiál no independente***

CNE no STAE hatudu ona kompromisu forte ba integridade eleitorál, no hala'o eleisaun ne'ebé hala'o ho di'ak, profesionál no inkluzivu. Instituisau rua ne'e hatudu ona sira nia independensia iha sira nia servisu, no hetan konfiansa husi parte interesadu sira.

Órgaun jestaun eleitorál sira hala'o diálogu inter-institusionál no kooperasaun ba área sira ne'ebé ladún define iha kuadru eleitorál, inklui mitigasaun informál ba konflitu. Kona-ba ida-ne'e, sira halo konsulta regulár ho partidu polítiku sira, kandidatu sira, autoridade lokál, grupu juventude, sociedade sivíl, polisia no media kona-ba preparasaun eleitorál.

Enquanto informasaun importante sira, hanesan kalendáriu eleitorál, resenseamentu husi eleitór sira, no fatin votasaun sira publika ona tuir tempu, kampaña edukasaun sívika no eleitorál akontese tarde, ladún vizivel, no kualidade la hanesan entre munisípiu sira. Maske nune'e, iha aumentu husi spot ho informasaun ba eleitór sira iha lora ikus molok eleisaun. Aleinde konferensia imprensa husi CNE no STAE no entrevista sira, STAE mós halo atualizasaun regular iha Facebook.

## 5. Preparasaun ba eleisaun

### *Preparasaun tuir tempu no organizasaun lojistika ba votasaun*

Hala'ó preparasaun tuir tempu atu harii estasaun votasaun 1.500 no fó formasaun ba ofisiál eleitorál sira hamutuk 17,000. Aumentu inkluzsaun ba eleitór sira liu husi introdusaun votu auzénsia, ne'ebé implementa iha sentru votasaun paralelu tolu iha Dili. Votasaun mós loke iha ospital neen, prizaun tolu no sentru izolamentu COVID-19 sira. Boletin votu imprime iha gráfika nasionál no materiál eleitorál sira seluk ne'ebé importante entrega uluk ba autoridade eleitorál munisipál sira. Organizasaun lojistika no seguransa halo ona hodi transporte no foti fali materiál eleisaun ne'ebé sensitivu, inklui akta apuramentu, hosi estasaun votu ho asesu ne'ebé susar. STAE fó akreditasaun ba fiskais liu 20,000, ne'ebé kontribui ba transparénsia prosesu eleisaun nian.

## 6. Resenseamentu eleitorál

### *Parte interesada sira hatudu konfiansa iha kualidade husi resenseamentu*

Iha eleitór hamutuk 861,367 ne'ebé rejistu ba votasaun prezidensiál hirak ne'e. Timoroan sira ne'ebé mak atinje maioridade (17) no sira ne'ebé rejista iha resenseamentu eleitorál konsidera nu'udar elejivel atu vota. Enkuantu parte interesadu sira la espresa sira nia preokupasaun kona-ba fiabilidade husi resensiamentu eleitorál, asuntu sira ne'ebé identifika ona husi misaun UE anteriór sira, mak inklui nafatin votante balun ne'ebé mate no emigradu. Timoroan sira ne'ebé hela iha rai-li'ur elejivel atu vota iha eleisaun prezidensiál. Ida-ne'e inklui eleitór sira iha Reino Unido (2,229), Korea Sul (1,277), Irlanda Norte (1,264), Portugál (856), no Austrália (1,487). CNE kansela votasaun iha Austrália tanba konstituisaun ezije atu halo atualizasaun ba resenseamentu eleitorál maibé ne'e la hala'ó (tanba restrisaun COVID-19 nian). Desizaun ne'e deklarala nula husi Tribunál Rekursu tanba violasaun ba direitu konstitusionál atu vota.

## 7. Rejistu ba kandidatu sira

### *Rejistu husi kandidatu 16 hala'ó ho efisiénsia husi Tribunál Rekursu*

La iha kritéria elijibilidade ne'ebé la razoavel ba rejistu husi kandidatu prezidensiál sira. Númeru kandidatu prezidensiál hamutuk sanulu resin neen, inklui feto na'in haat, ne'ebé rejistu ona husi Tribunál Rekursu iha loran 16 fulan-marsu, hafoin períodu husi loran 15 fulan-janeiru to'ó loran 4 fulan-fevereiru atu halo rejistu. Triajen ba nomeasaun sira ne'e hala'ó husi Tribunál Rekursu iha tempu badak nia laran durante loran 10 nia laran iha kolaborasaun ho STAE, no kandidatu sira hetan oportunidade atu hadi'a sira nia submisaun.

Kandidatu sira informa ba MOE UE kona ba komplikasaun ho rekizitu sira ba asinatura. Iha períodu rejistu tomak, la iha klareza kona-ba karik presiza atu asinatura apoiu husi munisípiu foun Atauro ne'ebé foin harii. Ida-ne'e la klarifika to'ó loran 14 Fevereiru ho desizaun husi Tribunál Rekursu. Rezultadu prátiku mak Atauro konsidera nu'udar parte husi munisípiu Dili ba Eleisaun ida ne'e. Maske nune'e, ida-ne'e la impede kandidatu sira atu kompete.

## 8. Komunikasaun Sosiál

### *Media Públiku no Privadu fó tempu gratis ba kandidatu sira hotu maibé kobertura notisia ladún balansu*

Provizaun legál sira ba liberdade espresaun no liberdade imprensa jeralmente hetan respeitu. Órgaun autoregularsaun imprensa (Konsellu Imprensa) observa ona katak meu komunikasaun sosiál halo operasaun livre hosi influénsia polítika, maske rekursu sira ne'ebé limitadu la fó dalan atu kumpre tomak ninia papél monitorizasaun ba komunikasaun sosiál. Media públiku no privadu barak mak halo tuir orden CNE nian atu fó tempu gratuitu (Direitu Antena) ba kandidatu sira.

Emisora Estadu, *Rádio-Televisão Timor-Leste* (RTTL), fornese tempu gratuitu no kobertura editoriál ba kandidatu na'in 16 hotu ho neutrál. Maske nune'e, ninia kobertura ba kampaña ladún ekilibriu no Lú-Olo no Lere mak kandidatu sira ne'ebé mosu dala barak liu. Programa gratuitu rua loroloron nian, *Ita nia Prezidente* no *Prezidente Ko'alia*, fó espasu (minutu 3 no 10 respetivamente) ho partisipasaun husi kandidatu hotu-hotu. Aleinde ne'e, RTTL fó ekipa média ida ba kada kandidatu atu kria konteúdu ba *Ita nia Prezidente*.

Grupu privadu *Grupo Media Nacional* (GMN) nia programa gratuitu, *Grande Entrevista*, entrevista kandidatu na'in 13. Kobertura notisia fó sai barak liu mak Ramos-Horta, no atensaun ne'ebé ki'ik liu ba Lú-Olo no Lere. Maske la iha limite ba anúnsiu ne'ebé selu, Ramos-Horta mak úniku kandidatu ne'ebé sosa publisidade iha GMN TV.

FRETILIN nia *Rádiu no Televizaun Maubere* (RTM) fornese kobertura radio direta kuaze loos ba kampaña Lú-Olo, no viola rekizitu atu fó oportunidade no tratamentu hanesan ba kandidatu hotu-hotu. Sira halo kobertura ladún barak ba Ramos-Horta no Lere, no la iha tan kandidatu seluk.

Enkuantu rádiu mak fonte informasaun importante liu iha área rurál sira, no estasaun rádiu komunitária 17 mak halao operasaun iha país laran tomak, problema ekonómiku halo sira barak mak susar liu. Estasaun radio comunidade barak mak oferese espasu gratis ba kandidatu sira, maibé ida ne'e la aproveita iha metade husi radio ne'ebé vizita husi observadór UE sira.

Media tradisionál ne'ebé monitoriza respeita silénsiu kampaña. La hanesan ho eleisaun prezidensiál 2017 nian, no tanba iha melloria iha kadru regulamentár, jornalista sira bele iha asesu ba estasaun votasaun sira no fornese kobertura loron eleisaun nian.

## 9. Komunikasaun Dijital no Media Sosiál

### ***Kampaña media sosiál ne'ebé kalmu no respetu hetan partisipasaun uitoan deit husi utilizadór sira***

Lejislasaun kona-ba eleisaun la inklui dispozisaun espesífiku ruma ba media sosiál ka limite atu selu publisidade online, no CNE la halo monitorizasaun ba media sosiál. Monitorizasaun UE nian hatudu katak sira la uza media sosiál hanesan espasu ida ba debate no post barak envolve de'it ema uitoan. Haree ba faktu katak numeru sira husi segidór la iha aumentu signifkativu durante periudu kampaña, mensajem sira la sai husi ema ne'ebé pertense ba media sosial husi kada kampaña. Aspektu pozitivu ida husi kampaña media sosiál mak, kuaze la iha lian inflamatóriu no atividade manipulasaun informasaun.

Kampaña sira kona-ba media sosiál halo kuaze de'it iha Facebook. Kuaze kandidatu sira hotu iha prezensa iha Facebook, maibé sira balun deit mak iha kampaña boot iha media sosial. Uniaun Europeia monitoriza no analiza pájina 40 husi Facebook no grupu sia iha período entre 2 – 16 Marsu. Pájina Facebook husi Ramos-Horta ne'ebé hetan verifikasaun mak iha segidór barak liu. Ninia pájina apoiu, *VOTA Dr. José Ramos-Horta*, mak hanesan veikulu prinsipál kampaña nian iha média sosiál. Maske apoiante sira husi partidu FRETILIN balu partisipa iha eventu kampaña ba kandidatu seluk, partidu halao kampaña íha media sosial eskluzivamente ba Lú-Olo.

Konteudu ne'be publika iha Facebook dala barak liu iha forma video live no foto husi eventu kampaña, no fahe kobertura media ba kandidatu sira. Programa eleitorál dala balu apresenta iha postu naruk sira, no, ho exesaun balu, mensajen sira jeralmente la refere ba opozisaun sira ka sira nia plataforma eleitorál sira. Lú-Olo no FRETILIN nia pájina krítiku kona-ba Ramos-Horta nia referencia ba krize konstitusionál; kritika hirak hetan resposta fali husi *VOTA Dr. José Ramos-Horta* no CNRT nia pájina balun.

Períodu silénsiu kampaña nian ignora tiha iha media sosial husi besik kandidatura hotu-hotu. Iha loron 17 no 18 Marsu, kandidatu na'in 12 fó sai material kampaña iha sira nia pájina pesoál ka sira

nia pájina apoiu no iha anúnsiu ativu ba kandidatu na'in tolu. Iha loron eleisaun pájina sira husi kandidatu Lú'Olo, Lere no Ramos-Horta iha anúnsiu ne'ebé selu.

## **10. Grupu husi sidadaun sira no observasaun**

### ***Observasaun doméstika no monitorizasaun kontribui ba prosesu eleitoral transparente***

STAE fó akreditasaun ba observadór nasional no internasionál sira ba eleisaun ida ne'e. Organizasaun nasional 19 partisipa, ho *Observatório da Igreja para os Assuntos Sociais* (OIPAS) ne'ebé haruka observadór na'in 1,300 ba país laran tomak, ne'ebé kontribui mós ba apuramentu paralelu. Organizasaun defisiénsia, RHTO, tau observadór hamutuk 150 hodi monitoriza asesu ba estasaun votu. Grupu observadór sira seluk inklui *Belun*, *Fundasaun Mahein*, *La'o Hamutuk no Universidade Dili*. Durante ne'e, iha mós monitorizasaun hosi Provedór ba Direitus Umanus no Justisa, Komisaun Anti-Korrupsaun, no Inspesaun-Jerál.

Komunidade País sira Lian Portugés (CPLP) haruka misaun observasaun ida ho membru hamutuk 1 - no Rede Ázia ba Eleisaun Livre (ANFREL) haruka misaun ida ho membru 5. Embaixada balun iha Dili partisipa iha ezersísiu observasaun diplomátika.

## **11. Partisipasaun Politika husi Feto sira**

### ***Kestaun sira ne'ebé afeta ba feto sira ladún mosu iha mensajen kampaña sira***

Timor-Leste iha proporsaun aas liu husi feto sira iha parlamentu no aas liu iha Ázia no Pasífiku ho pursentu 38 (feto 26 husi 65 mak membru husi parlamentu). Konstituisaun iha artigu 17 garante direitu hanesan ba mane no feto no kuota legál sira aselera representasaun feto nian iha Parlamentu Nasionál. Maibé, efetividade hosi sistema kota hodi fó feto sira-nia lian iha Timor-Leste hamosu debate barak. Trauma violénsia pos-konfliktu hamutuk ho norma patriarkál sosiál no jéneru Timor-Leste nia, nafatin metin iha sosiedade no parese fó forsa ba papél sekundáriu husi feto sira. Aleinde ne'e, violénsia doméstika estruturál hasoru feto no labarik feto kontinua aas, no sai barreira ba partisipasaun ida ne'ebé inkluzivu no substansiál liu husi feto sira iha vida pública.

Observadór UE nota katak feto sira partisipa iha número ki'ik liu duké mane sira iha eventu kampaña no oradór sira uitoan liu mak feto. Mensajen kampaña nian ladún refere ba kestaun sira ne'ebé afeta feto sira. Observadór UE nian nota mós katak husi eventu 120 resin ne'ebé observa, iha de'it kandidatu tolu ne'ebé ko'alia kona-ba violénsia doméstika hasoru feto sira, inklui ida ne'ebé fó esplikasaun ba problema sosiál ida ne'e tanba dezempregu no saláriu ne'ebé ki'ik.

## **12. Partisipasaun Politika husi Ema ho Defisiénsia**

### ***Asesu fíziku ba estasaun votu sai barreira ba ema ho defisiénsia***

La iha medida espesífika atu fasilita votasaun ba ema ho defisiénsia sira ne'ebé introdús husi lei ka implementa husi STAE. Proposta ida atu aprova votasaun braille la pasa iha Parlamentu Nasionál. Asesu fíziku susar ba estasaun votu sai barreira ba partisipasaun polítika. Timor-Leste la asina Konvensaun kona-ba Direitu Ema ho Defisiénsia sira-nian.

Organizasaun Nasionál ba Defisiénsia (RHTO-DPO) hatudu katak iha ema na'in 38,118 maka sofre defisiénsia balu. Atu hadia rekolla dados kona-ba ema ho defisiénsia, RHTO-DPO rekomenda katak sensus tuirmai tenke inkorpora iha Grupu Pergunta Badak Ne'en Washington nian relasiona ho defisiénsia ne'ebé iha akordu internasionál.

### **13. Votasaun, kontajen no Transmisaun husi Rezultadu sira**

*Prosedimentu votasaun implementa ho di'ak, maske kontajen no apuramenta hala'o ho profisionál*

#### **Loron Eleisaun**

MOE UE nia ekipa observasaun 20 vizita estasaun votu 174 iha loron eleisaun iha munisípiu 12 no Rejiaun Administrativa Espesiál Oecusse-Ambeno.

#### *Abertura*

Ekipa observa abertura iha estasaun votu 20, no ofisiál eleitorál hotu hola prezensa no hahú tuir oras ne'ebé determina. Enjerál, observadór UE sira avalia prosedimentu abertura hanesan di'ak ka di'ak tebes iha estasaun votu hotu ne'ebé observa no deskreve prosesu ne'e hanesan hakmatek, no simples.

#### *Votasaun*

Loron eleisaun ida ne'ebé organiza ho di'ak, maske ho insidente ki'ik balun inklui iha sentru votasaun paralelu ida. MOE UE nia halo avaliasaun jerál ba operasaun votasaun hanesan di'ak ka di'ak tebes iha estasaun votu hotu ne'ebé observa no deskreve prosesu hanesan hakmatek no ordenadu. Tuir observasaun ofisiál eleitorál sira hala'o sira nia knaar ho imparcialidade. Sira tuir prosedimentu votasaun, ho exesaun ki'ik de'it. Suco sira ne'ebé ho lista eleitór naruk liu hetan atrazu tanba ofisiál eleitorál sira lori tempu naruk atu hetan eleitór nia naran iha lista. Organizasaun husi estasaun votu iha estasaun votu ne'ebé observa asegura segredu votu nian no estasaun votu 101 ne'ebé observa asesivel ba ema ho defisiénsia sira. Prezensa husi fiskál sira iha estasaun votu 138 ne'ebé observa kontribui ba transparénsia husi prosesu.

#### *Enserramentu no kontajen*

Observadór MOE UE avalia prosesu kontajen hanesan di'ak ka di'ak tebes iha estasaun votu 14 husi 16 ne'ebé observa . Haree katak maioria estasaun votu ne'ebé observa tuir prosedimentu sira iha no balu halo rekonsiliaaun ba boletin liu kontajen ona. Prezensa husi fiskál sira husi partidu no sira nia dezempeñu di'ak asegura transparénsia ba prosesu ne'e. Tanba fiskál partidu sira simu kopia ida hosi akta apuramentu estasaun votu nian, sira bele verifika rezultadu hirak ne'e hasoru rezultadu ofisiál iha nível nasional. Observadór nasional sira hola prezensa iha estasaun votu 9 husi 16 ne'ebé observa.

#### *Transmissaun husi Rezultadu Ofisiál Provizóriu*

Observadór sira UE nian tuir apuramentu rezultadu iha sentru apuramentu hotu. Tuir observasaun sentru tabulasaun sira jerálmente jere ho di'ak. Rezultadu munisipál progresivu husi STAE transmite iha RTTL durante prosesu apiuramentu tomak. Fiskál no observadór sira hetan asesu ba sentru tabulasaun munisipál.

### **14. Keixa no Ofensa Eleitorál**

*Rejista keixa eleitorál uitoan de'it, kandidatu sira fiar imparcialidade husi Tribunál Rekursu*

CNE iha autoridade atu deside kona-ba keixa eleitorál sira ne'ebé kandidatu sira hato'o durante hakat oin oin husi prosesu eleitorál, inklui mós submisaun kandidatura ba apuramentu finál husi rezultadu sira. Tribunál Rekursu mak Tribunál último iha matéria eleitorál. Kandidatu no partidu polítiku sira konsidera Tribunál Rekursu imparsiál bainhira foti desizaun kona-ba disputa eleitorál sira.

Kandidatu sira husu Tribunál Rekursu atu deside kona-ba votasaun iha Austrália no dezeñu boletin votu nian. Lú-Olo no CNRT husu rekursu kona ba deliberaaun husi CNE atu kansela votasaun iha Australia. Iha ninian argumentu, Tribunál Rekursu fó importánsia liu ba direitu konstitusionál atu



vota kompara ho interpretasaun rigorozu ba Konstituisaun ne'ebé ezije atu halo atualizasaun ba resenseamentu molok eleisaun. Ekipa Lú-Olo husi mós pareser husi Tribunál Rekursu kona-ba konformidade legál husi boletin votu nian kona-ba utilizasaun husi foto no simbulu sira. Pedidu ne'e la simu husi Tribunál Rekursu ne'ebé deklarata katak nia la iha mandatu atu interpreta lei durante prosesu eleisaun.

Númeru keixa kiik mak hatama ba CNE iha nível munisípiu. Hirak ne'e hatama ona ba revizaun iha nivel nasionál. Maioria keixa hirak ne'e relasiona ho insidente kampaña. Observadór sira husi UE relata katak Komisáriu sira husi CNE halo mediasaun atu rezolve konfliktu ki'ik sira durante kampaña ne'e. Krime eleitorál balu tuir investigasaun polísia nian, barak liu mak iha relasaun ho konfrontu ka provokasaun entre apoiante sira iha komisiu polítiku.

Observadór sira husi MOE UE fó informasaun katak iha keixa durante votasaun iha sentru votasaun 2 husi 16 ne'ebé sira observa, hotu kona ba validade husi boletin.

*Uniaun Europeia hetan konvite husi Governu Timor-Leste hodi observa eleisaun prezidensiál sira iha tinan 2022. MOE EU nian lidera husi Domènec Ruiz Devesa, Membreu Parlamentu Europeu husi España. Misaun ne'e kompostu husi ekipa prinsipál husi annalista ualu ne'ebé mai Timor-Leste iha loron 14 fulan-fevereiru, no observadór sira ba tempu naruk 26 (LTO) ne'ebé marka prezensa hahú husi loron 22 fulan-fevereiru. Aleinde ne' e, misaun ne'e mos halibur observadór ba kurtu prazu husi membru UE ne'ebé iha Timor-Leste no husi nasaun viziñu sira. Observadór sira mai hosi Estadu membru UE 19 no Canada.*

*Uniaun Europeia avalia prosesu eleitorál tomak kompara ho obrigasaun no kompromisu internasionál sira ba eleisaun demokrátiku no mós lei sira Timor-Leste nian. MOE UE mak independente iha nia konkluziun no tuir Deklarasaun Prinsípiu ba Observasaun Eleitorál Internasionál, ne'ebé hetan aprovasaun iha Nasoins Unidas iha fulan-outubru tinan 2005.*

**Versaun iha lian Inglés husi deklarasaun preliminar MOE UE nia mak versaun  
ofisial úniku**

*Ba kestaun media nian, halo favor kontaktu Maria Telleria, Ofisiál Imprensa MOE UE  
Tel. +670 7715 3494 / Email: maria.telleria@eueom-timorleste.eu*